

ընդարձակագոյն եղեւ քան զմասն Լատինաց . և աշակերտ իւր Յակոբ վարդապետ եհան անդ ջուր քաղցր : Նորոգեաց նաեւ զեկեղեցին և զարդարեաց զնա սպասուք :

Իսկ այլազգի բնակիչք թաղին մախացեալ ընդ այն , երկնէին 'ի միտս իւրեանց և սպասէին դիպող ժամու յափըշտակել զտեղին 'ի ձեռաց քրիստոնէից : Յետ անցանելոյ ժամանակս ինչ , յաւուր միում Միւֆթի թաղին այնորիկ եկեալ փակեաց զդուռ տանն , զոր շինեաց Գրիգոր , եւ կնքեաց զնա , և մնաց այնպէս ամիսս իբրեւ 4 : Եւ 'ի խնդրել նորա դրամս . ետուն նմա 200 դահեկան , և խոտաշան եւս՝ եթէ բացցէ զդուռն : Ի ամին ժամանակի եկեալ էր անդ Գրիգոր վարդապետ Կեսարացի 'ի քաղաքէ իւրմէ . դիմեցին առ նա քահանայք եկեղեցւոյն . եւ յայտ արարեալ նմա զդիպուածսն , խնդրեցին լինել ձեռքնտու ինքեանց . այլ նա փոխանակ օգնելոյ նոցա՝ սաստեաց և յանդիմանեաց զնոսա . « Ո՛վ իցէք դուք որ յայդպիսի դործս լինիք ձեռնամուխ . զի Լատինաց և բնիկ բռնակչաց պարտ է հոգալ զայդ խնդիր » : Եւ այլ խիստ և յիմարական բանիւք զզուեալ մերժեաց զնոսա յերեսաց իւրոց . և նոցա տարակուսեալ մանաւանդ թէ յիմարեալ իսկ՝ գնացեալ առ այլազգիին և յետս պահանջեցին զգրամն զոր ետուն : Եւ նորա տեսեալ թէ անկեալ են 'ի մտաց Հայք , ազդ արարեալ կոչեաց փութապէս առ ինքն զգաստ գիտնականաց և զամբոխ մեծ 'ի ժողովրդոց , և գնացեալ նոքօք յեկեղեցին ետ ձայնել զժամ աղօթից ըստ օրինաց իւրեանց , և կացին ամենեքեան յաղօթս եւ փոխեցին 'ի մզկիթ . տեսեալ զայս Հայոց պաշարեցան 'ի օուգ մեծ :

Իսկ Գրիգոր վարդապետ՝ զոր Խուլ կոչէին , անտես արարեալ զթշուառութիւն ժողովրդոցն , պատաղեալ էր զգործովք իւրովք՝ եւ ջանայր արկանել աղմուկ խռովութեան 'ի մէջ ազգին սակս խնդրոյ Պատրիարքութեան , զի հակառակեալ ընդ Յովհաննու վարդապետի՝ հալածեաց զնա՝ ի Պուրուսայ . և ինքն տիրեաց բռնութեամբ Պատրիարքական աթոռոյն՝ առանց Արքունի հրամանի , եւ եղեալ 'ի տեղի իւր փոխանորդ զՅովհաննէս վարդապետ զեղնկացի , որ կոչէր Բէկ Բէհարէ յագ , և ինքն գնաց յաշխարհն Լեհաց : Իսկ քահանայք և ժողովուրդք եկեղեցւոյն Ս . Նի-